



Inatsisartut

*Aningaasaqarnermut Ataatsimiititaliaq
Finansudvalget*

Ulloq/Dato: 24. juni 2011
J.nr.: 01.31.06/11-00536

Aningaasaqarnermut Naalakkersuisoq

Aningaasaqarnermut Ataatsimiititaliap suliaq nr. 01.31.06/11-00536 pillugu sisamangornermi ulloq 23. juni 2011-mi aalajangiineranik Naalakkersuisunut ilisimatitsineq.

Suliffissaaleqisunut immikkut ittumik iliuseqarnissamut kiisalu aatsitassarsiornermut uuliasiornermullu tunngatitamik immikkut ittumik iliuseqarnissamut ilassutissatut aningaasaliinissamut qinnuteqaat

Naalakkersuisut **inassutigaa**t,

- konto pingaarnermi 64.01.04-mi, Piginnaasanik ineriartortitsiviusumik pikkorissarnernut tunngasumi, aningaasaliissutit 5.500.000 kr.-inik amerlineqassasut,
- konto pingaarneq 64.13.25, Suliffissaaleqisunut immikkut ittumik iliuseqarnermut tunngasoq, pilersinneqassasoq 5.100.000 kr.-inik aningaasaliissutitalerlugu,
- konto pingaarnermi 20.05.31-mi, Kommunini aningaasartuutaanerusussanut immikkoortitanut tunngasumi, aningaasaliissutit 3.600.000 kr.-inik ikilineqassasut,
- konto pingaarnermi 64.13.19-imi, Nuttarneruleersitsiniarluni aningaasaliissutinut tunngasumi, aningaasaliissutit 2.000.000 kr.-ini ikilineqassasut, aamma
- konto pingaarnermi 87.00.88-imi, Nunaqarfinni isorliunerusunilu sanaartortitsinissamut pilersaarutinut tunngasumi, suliasamat nr. 996.29.105-imut, Nunaqarfinni isorliunerusunilu sanaartortitsinissamut pilersaarutit 2009-mut tunngasumut, aningaasaliissutit 5.000.000 kr.-inik ikilineqassasut.

Aningaasaqarnermut Ataatsimiititaliap oqaaseqaatai

Nalinginnaasumik aammalu aatsitassarsiornermut tunngatillugu suliffissaqartitsiniutinik aallartitsinissaq siunertaralugu aningaasanik nuussinissaq Naalakkersuisut suliami matumani qinnutigaa.

Nalinginnaasumik iliuseqarnissamut tunngatillugu immikkut iliusissat tallimat siunnersuutigineqarput, soorlu nuna tamakkerlugu immikkoortitseriaatsimik ineriartortitsinissaq aammalu ilinniarsimangitsut specialarbejderimut assingusumik pikkorissartinneqartarnerannik pilersitsineq.

Aatsitassarsiornermut tunngasumik immikkut iliuseqarnissamut aningaasanik immikkoortitsinissaq siunnersuutigineqarpoq, soorlu siunissami aatsitassarsiornermik suliniutini nunaqavissut peqataanerisa siuarsarneqarnissaa siunertaralugu immikkut ilinniartitsinernik aatsitassarsiornermut qillerinermullu sammititanik pilersitsinissaq.

Iliuseqarnissaq siunnersuutigineqartoq 2011-mi aamma 2012-imi ingerlassaaq. Qinnuteqaammili uani 2011-mi aningaasatigut kinguneqaatit kisimik suliarineqassapput, tassa

iliuseqarnerup ukiup tulliani nanginneqarnerani aningaasatigut kinguneqaatit 2012-imi aningaasanut inatsisissatut siunnersuummut ilanngunneqarnissaat naatsorsuutigineqarmat.

Suliamik isummerfiginerani Aningaasaqarnermut Ataatsimiititaliaq marlunnut avippoq.

Ataatsimiititaliami ikinnerussuteqartut, Aleqa Hammondip (Per Berthelsenimut sinniisoq) aamma Doris Jakobsenip (Finn Karlsenimut sinniisoq), makku tunngavilersuutigalugit inassuteqaatit maanna **tapersersinnaanngilaat**:

Ikinnerussuteqartunit ataatsimut isigalugu oqaatigissavarput 2010-mi aammalu 2011-mi aningaasanut inatsisip akuersissutiginerannut atatillugu Siumumit kissaatigisimagatsigu nunatsinni suliffissaaleqisut amerliartuinnartut isiginiarneqassasut. Kissaateqarnerput eqqortuusooq ilassutitut aningaasaliissuteqarnissamik qinnuteqaatip matuma takutippaa. Tulliullugu sooruunami nuannaarutigaarput suliffissaaleqineq annertusiartuinnartoq Naalakkersuisooqatigiinnit kiisami iliuseqarfingineqalermat. Qinnuteqaalli una tapersernejartinnagu qinnuteqaatip kingunissai erseqqinnerusumik paasinarsisinneqartariaqartut isumaqarpugut, tassa sattalluni aalajangiinnermut peqataanissarput kissaatiginningsigu.

Kontoni pingaarnerni 87.00.88-imi, Nunaqarfinni isorliunerusunilu sanaartortitsinissamut pilersaarutitut tunngasumi, 20.05.31-mi, Kommunini aningaasartuutaanerusussanut immikkoortitanut tunngasumi, aammalu 64.13.19-imi, Nuttarnerulersitsiniarluni aningaasaliissutitut tunngasumi, aningaasaliissutit ikilineqarnerat assut eqqarsarnartoqartikkatsigu Siumumit oqaatigissavarput. Aningaasaliissutit taakku nunaqarfinni isorliunerusunilu ineriartortitsinissamut immikkut naatsorsuusaaapput siunertaminnullu atorneqanngippata isumaqarpugut tamanna assut isumakulunnartoqartoq. Taamaalillunilu aningaasat kontonit taakkuninnga nuunneqarnerat qanoq kinguneqassanersoq paasinarsisinneqanngilaq. Taamatuttaaq taama iliuseqarneq tunngavigalugu suliffissaaleqisut - sulilertoqassappat - qassit sulilerumaarnersut ersersinneqanngilaq. Naalakkersuisut qinnuteqaataannit takusinnaasat naapertorlugit aningaasat pikkorissartitsinernut annertunerusumik atorneqarniarpassippat, tamannalu namminermi ajunngilluinnarsinnaavoq, suliffinnulli ataavartunut taartaasinnaanani.

Kiisalu isumaqarpugut iliuusissatut siunnersuutigineqartoq nunatsinni nunaqarfinnut isorliunerusunullu suliffissaaleqinermik annertuumik eqqugaasunut sunnuteqassanersoq paasinarsisinneqartariaqartoq. Tamannalu pisariaqarpoq aningaasaliissutinik allannguinerit akuersissutigineqartinnagit.

Isumaqarpuguttaaq iliuusissatut siunnersuutigineqartut isummerfiginnginnerini suliffissaaleqinermik akiuiniarneq pillugu ataatsimoortumik pilersaarummik Naalakkersuisut saqqummiusseqqaartariaqartut. Suliffeqarnikkut iliuusissat pillugit ataatsimoortumik pilersaarummik Naalakkersuisut suliaqanngippata iliuserinialersaagaq aaqqiigallarnerinnaaratarsinnaavoq.

Aalajangiisoqartinnagu qinnuteqaammi amigaatit taakku misissornissaat amerlanerussuteqartunit ajoraluartumik kissaatigineqarsimannngilaq, tamannalu Siumumit assut ajuusaarnartipparput. Apeqqutit siuliani taaneqareersut pilertortumik akineqartussanngorlugit Naalakkersuisunut apeqqutigineqarnissaat Siumumit kissaatigineqarsimavoq, tamannali amerlanerussuteqartunit kissaatigineqarsimannngilaq, taannattaarlu Siumumit ajuusaarnartinneqarpoq.

Ataatsimiititaliami amerlanerussuteqartut, Olga P. Berthelsenip, Andreas Uldumip aamma Aqqaluaq B. Egedep (Juliane Henningsenimut sinniisoq), inassuteqaatit **taperserpaat**.

Suliffissaaleqisut amerliartuinnartut immikkut iliuseqarfingineqarnissaannik pisariaqartitsineq Naalakkersuisunit uppenarluartumik tunngavilersorneqartoq amerlanerussuteqartut isumaqarpugut. Naalakkersuisut iliuusissaat suliffissaaleqisunut nukissakinnerusunut

nukissaqarnerusunullu sammitinneqartut amerlanerussuteqartut maluginiarpaat, sulisinnaasummi aatsitassarsiormik inuussutissarsiuteqarnerup piffissami aggersumi siuariartorfiunissaani peqataasinnaangorlugit piginnaasaannik qaffassaanissamut iliuusissat ilaat toqqaannartumik sammitinneqarmata. Taamaaliornikkut suliffissat ataavartumik amerlineqarnissaannut tunngavissat pilersinneqassapput, tamannalu naalakkersuinikkut kissaatit Inatsisartuni oqaatigisatsinnut naapertuuppoq.

Iliuusissatut siunnersuutigineqartut 1. juli aallartereerneqassasut amerlanerussuteqartunit maluginiarneqarpoq, tamannalu tapersorsornartinneqarpoq. Taamaattumillu iliuusissat nutaat aallartinneqarnissaat siunertaralugu qinnuteqaatip matuma sapinngisamik piaarnerpaamik akuersissutigineqarnissaa pisariaqartinneqartoq amerlanerussuteqartut isumaqarput.

Kommunini aningaasartuutaanerusussanut immikkoortitatut aningaasaliissutit ikilisinneqarnissaannik siunnersuut KANUKOKA-mit akuersarneqartoq amerlanerussuteqartunit maluginiarparput. Taamatuttaaq aningaasanik nuussinissamik siunnersuutigineqartoq anguniakkanut aningaasanut inatsimmi kontomi pingaarnermi 87.00.88-imi, Nunaqarfinni isorliunerusunilu sanaartortitsinissamut pilersaarutinut tunngasumi, aningaasaliinermut tunngavinni allassimasunut naapertuulluarpoq, tassanimi ilinniagaqarneq, ilinniaqqinneq aammalu suliffinni allani sulilernissamut ilinniaqqinneq immikkut taaneqarput. Tamanna tunngavigalugu nuussinissaq siunnersuutigineqartoq ajornartorsiutitaqartut isiginngilarput. Akerlianik aningaasat aningaasanut inatsimmi sillimmatitut uninngaannarnatik maanna suliffissaaleqisut akorneqarnerannut atorneqarnerat pitsaasutut isigaarput.

Amerlanerussuteqartut kissaataat naapertorlugu aalajangiisoqarpoq.

Naggasiullugu oqaatigineqassaaq kontomut pingaarnermut 64.01.04-mut, Piginnaasanik ineriartortitsiviusumik pikkorissarnernut tunngasumut, missingersuutinut ilanngussatut nassiunneqartoq kukkuneqarmat, tassa missingersuutit immikkoortiternerini taamatullu oqaasertaanni aningaasat kukkusut allanneqarsimmamata. Tamanna missingersuutinut ilanngussap 2011-mut ilassutit aningaasaliissutinut inatsimmut ilanngunneqannginnerani iluarsineqssaaq.

Aningaasaqarnermut Ataatsimiititaliap aalajangiinera

Siuliani allassimasutut paasinnillutik Aningaasaqarnermut Ataatsimiititaliami amerlanerussuteqartut Naalakkersuisut inassuteqaataat **akuersissutigaaat**. Aningaasaqarnermut Ataatsimiititaliami ikinnerussuteqartut Naalakkersuisut inassuteqaataat akuersissutigisinnaanngilaat.

Aningaasaqarnermut Ataatsimiititaliaq sinnerlugu

Olga P. Berthelsen
Aningaasaqarnermut Ataatsimiititaliap siulittaasua